



Komunikadu Imprensa
Tribunál Judisiál Primeira Instánsia Dili
11 Dezembru 2024

Instalasaun Edifísiu foun Tribunál Judisiál Primeira Instánsia Dili responde ona kestaun seguransa no protesau ba ofendida no testemuña sira ninia ezijénsia

Iha 6 Dezembru 2024, Prezidente da Repúblika inagura edifísiu foun Tribunál Judisiál Primeira Instánsia Dili, ne'ebé hahú konstrui iha tinan 2020. Tribunál foun ne'e lokaliza iha Kaikoli, Dili. Ho inagurasaun edifísiu foun ne'e responde ona preokupasaun JSMP nian durante tinan barak atu iha fatin ketak ne'ebé seguru ba ofendida nomós testemuña sira iha tribunál antes audiénsia julgamentu.

“JSMP apresia no kongratula Tribunál Rekursu tanba konstrui ona edifísiu foun Tribunál Judisiál Primeira Instánsia Dili, ho facilidade ida ne'ebé mak kompletu hanesan, fatin hein ba ofendida, testemuña no arguidu sira antes audiénsia julgamentu. JSMP fiar katak ho facilidade sira ne'e bele asegura no proteje di'ak liután ofendida no testemuña sira nia direitu no sira mós sente livre atu fó sira nia deklarasaun no depoimentu iha julgamentu,” dehan Sr. Casimiro dos Santos, Diretór Ezekutivu Interinu JSMP.

Bazeia ba observasaun JSMP nian iha tinan barak nia laran, tribunál judisiál primeira instánsia hotu hatudu katak durante ne'e ofendida no testemuña sira sente ladun seguru bainhira ba iha tribunál, tanba antes julgamentu hahú ofendida no testemuña no arguidu inklui família hosi intervenente sira tuur hamutuk iha fatin ne'ebé mak hanesan. Situasaun ne'e kondisiona ofendida no testemuña sira iha presau no iha ta'uk nia laran tanba permite interesaun no reazem iha karakter ofensiva no terror hosi arguidu ka família arguidu hasoru ofendida sira antes julgamentu ne'ebé rezulta tantu ofendida no testemuña sira sente ladun seguru atu hato'o sira ninia deklarasaun no depoimentu iha julgamentu laran. Enkuantu tuir lei estadu iha devér atu garante protesau ne'ebé adekuada ba ofendida no testemuña sira atu livre hosi kualker forma presau no intimidasaun durante julgamentu hodi kontribui administrasaun justisa ida ne'ebé justu ba ema hotu.

JSMP rejista katak ho instalasaun edifísiu foun ne'e konstitui sala ba audiénsia julgamentu hamutuk sanolu (10) ne'ebé dividi ba iha andar okos iha sala audiénsia prinsipál rua (2) kompletu ho facilidade sira hanesan mikrofone, makina gravasaun no video inklui CCTV. Alende sala prinsipál rua, iha mós sala audiénsia naton tolu (3). Enkuantu iha andar leten iha sala audiénsia hamutuk lima (5), sala ki'ik tolu (3) no sala naton rua (2), sala eskritóriu ba juis, ofisiál justisa no funsióriu sira ho facilidade kompletu, inklui sala própriu ba prokuradór/a rua (2), sala própriu ba defensor rua (2) no advogadu rua (2).

Entre facilidade sira ne'ebé instaladu, JSMP konsidera katak provizaun espasu ketak ba ofendida, testemuña no arguidu sira marka duni diferensa hosi instalasaun edifísiu tribunál antiga sira ka edifísiu atuál.

Ne'e mundansa no avansu importante ida tanba projesaun ne'e adapta no akomoda evolusaun no dinamika nesesidade ba grupu vulnerável sira ne'ebé dalabarak bele revitimizado tanba sistema no kondisaun sira iha tribunál ne'ebé permite risku ka vulnerabilidade ba intervenente sira. Espasu própriu ba testemuña sira sei garante no proteje mós testemuña sira iha kazu ho natureza korrupsaun sira ne'ebé envolve dirijente ka ofisiál alta entidade sira ne'ebé potencialmente iha risku ba seguransa testemuña sira.

JSMP fiar katak espasu ne'e la'os fornese seguransa ba intervenente sira, maibé fornese mós konvinensia ba autór judisiáriu sira no espera katak autór judisiáriu sira dezempeña an ho qualidade atu garante justisa ba ema hotu.

Tinan barak ona JSMP no parseriu sira iha setór justisa preokupa ho kondisaun sira iha leten no finalmente iha tinan 2024, Tribunál Judisiál Primeira Instáncia Dili consege kria ona kondisaun sira ne'e.

JSMP husu ba Tribunál Rekursu atu kontinua kria kondisaun hanesan iha Juridisaun tribunál sira seluk, nune'e bele asegura no proteje ofendida no testemuña sira iha kada juridisaun ho di'ak. Alende ne'e JSMP mós husu ba Governu atu harii tribunál sira iha kada munisípiu nune'e bele asegura comunidade sira asesu justisa ho lalais, justu no baratu.

JSMP fiar katak kondisaun sira ne'e sei garante no asegura julgamentu ba kazu kompleksu sira ho di'ak no garante comunidade sira asesu ba justisa tuir lei haruka.

Atu hetan informasaun kompletu favor kontaktu:

Casimiro dos Santos
Diretor Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883/77257466
Website: <https://jsmp.tl>
info@jsmp.tl